

**SERANGAN ARAB SAUDI KE ATAS HOUTHİ (2011-2015):  
KESANNYA KE ATAS YAMAN**  
*(Saudi Arabia Attacks on Houthi (2011-2015): Impact On Yemen)*

Muhammad Khairul Iman Hussin\* & Mohd Roslan Mohd Nor\*\*

**Abstrak**

Serangan Arab Saudi pada tahun 2015 merupakan satu bentuk ancaman terbesar bagi negara kestabilan Yaman. Serangan Saudi tanpa henti terutama ke atas kumpulan Houthi yang dianggap sebagai militan itu ekoran kebangkitan kumpulan terbabit yang mendorong kepada kudeta kerajaan Yaman semasa Revolusi Rakyat 2011. Banyak wilayah di bawah pengaruh Houthi diserang malah segala bentuk aset milik tentera mereka turut dimusnahkan. Namun di sebalik serangan itu, jutaan penduduk Yaman menjadi mangsa. Justeru, kajian ini bertujuan bagi menganalisis kesan ke atas Yaman dengan menggunakan metode analisis secara tematik melalui penelitian ke atas tiga skop utama secara kolektif; pertama, dari sudut politik, kedua dari sudut sosial dan ketiga dari sudut ekonomi. Hasil kajian mendapati bahawa kesan konflik yang berlaku membawa kepada ketidakstabilan politik, kemelesetan ekonomi dan kemunduran sosial.

**Kata kunci:** Serangan, Arab Saudi, Houthi, Kesan

**Abstract**

*Saudi Arabia's attack in 2015 is the biggest threat to Yemen. The Saudi attacks were launched relentlessly, especially on the Houthi group, which was considered to be militants following the rise of the group involved, which led to the coup of the Yemeni government during Uprising 2011. Many regions under the influence of the Houthis were attacked and even all forms of assets belonging to the Houthi army were also destroyed. But despite the attack, millions of Yemenis became victims. Thus, this study aims to analyze the impact on Yemen by using a thematic analysis method through research on three main scopes collectively; first, from a political point of view, second from a social point of view and third from an economic point of view. The results of the study found that the effects of the conflict led to political instability, recession and social backwardness*

**Keywords:** Attack, Saudi Arabia, Houthi, Impact

**Pendahuluan**

Konflik antara Arab Saudi dan Houthi mempunyai naratifnya yang tersendiri, dan wajar untuk difahami secara ringkas sejarah hubungan mereka pada peringkat awal penubuhan negara Yaman pada kurun ke-19. Pada peringkat ini, Houthi belum muncul, dan nama gerakan ini bertitik tolak daripada kematian pemimpin mereka iaitu Hussin Badr al-Din al-Houthi yang mati dalam peperangan sivil dengan pihak kerajaan Ali Abdullah Saleh pada tahun 2004.<sup>1</sup>

---

\* Muhammad Khairul Iman Hussin, Master's Degree Candidate at Department of Islamic History and Civilization, Academy of Islamic Studies University of Malaya 50603 Kuala Lumpur, Malaysia. Email: [17106246@siswa.um.edu.my](mailto:17106246@siswa.um.edu.my)

\*\* Mohd Roslan Mohd Nor (Corresponding Author), Professor at Department of Islamic History and Civilization, Academy of Islamic Studies University of Malaya 50603 Kuala Lumpur, Malaysia. Email: [m\\_roslan@um.edu.my](mailto:m_roslan@um.edu.my)

Namun, jika disoroti secara terminologi, Houthi ini berasal daripada gerakan Zaidiyah yang berfahaman syiah, dan mereka merupakan pelopor awal dalam penubuhan negara Republik Yaman pada awal kurun ke-20.

Sepanjang kurun ke-20 ini, sejarah memperlihatkan naratif hubungan antara dua pihak Zaidiyah dan negara Arab Saudi dalam nuansa politik yang agak stabil walaupun terdapat sedikit ketegangan pada tahun 1934 sewaktu berlakunya pertempuran antara penguasa Arab Saudi iaitu Bani Sa'ud dengan penguasa Zaidiyah. Peperangan ini tercetus akibat persengketaan dalam isu kedaulatan wilayah yang berada di utara Yaman dan ia berbatasan dengan Saudi iaitu wilayah 'Asir.

Dari sudut asal-usul hak kedaulatan, pada peringkat awalnya wilayah 'Asir merupakan wilayah di bawah jajaran pengaruh Zaidiyah sebelum ditakluk oleh Empayar Idrisiyyah. Kemudian, Saudi menaklukinya pula setelah menumpaskan Idrisiyyah dalam peperangan kecil pada tahun 1926.<sup>2</sup> Oleh sebab demikian, berlakunya pertempuran antara Bani Sa'ud dengan Zaidiyah natijahnya membawa kepada genjatan senjata yang dikenali sebagai Perjanjian Taif pada tahun 1934. Walhasilnya, 'Asir kekal di bawah pengaruh kuasa Saudi.<sup>3</sup>

Berikutan dengan perjanjian tersebut, maka hal tersebut mendorong kepada fasa yang lebih stabil dalam hubungan bilateral antara Zaidiyah dan Bani Sa'ud. Senario ini boleh dilihat melalui naratif perkembangan diplomatik yang terhasil, dan diperkukuhkan sehingga era kejatuhan Zaidiyah pada tahun 1960 apabila muncul gerakan revolusi di bawah pimpinan Abdullah bin Sallal yang terinspirasi dengan semangat Revolusi Pan-Arabisme di Mesir. Revolusi awal semangat ini dicetuskan oleh tokoh republik Mesir iaitu Jamal Abdul Naseer pada tahun 1952, kemudian berkembang luas ke dunia Arab sehingga tahun 1967.<sup>4</sup>

Saat ini, hubungan antara Zaidiyah dan Saudi masih lagi terjalin kerana prinsip konservatif yang dijunjung bersama ketika itu berbanding gerakan revolusi yang bersifat ultra moden. Buktinya boleh dilihat apabila Zaidiyah yang dipimpin oleh Imam al-Badr bin Ahmad dan Saudi yang dipimpin oleh Raja Faisal bin Abdul Aziz membentuk blok bersama menentang gerakan dan kemaraan blok revolusi yang terdiri daripada kumpulan revolusi di utara Yaman yang dipimpin oleh Abdullah bin Sallal dan Mesir yang dipimpin oleh Jamal Abdul Naseer. Kemudian, hal ini mendorong kepada peperangan yang akhirnya memihak kepada gerakan revolusi, kemudian Abdullah Sallal diangkat sebagai Presiden yang pertama pada tahun 1962.<sup>5</sup>

---

<sup>1</sup> Sarhan, Mugahed S., Mohd Irwan Syazli Saidin, and Zarina Othman. "The Religious-Political Ideology of Houthis' Rebellion in Yemen: Theoretical Perspective of the Divine Right to Rule." *Islamiyyat: International Journal of Islamic Studies* 44, no. 1 (2022): 237.

<sup>2</sup> Ghanem, Isam. "The Legal History of A Sir (Al-Mikhlaif Al-Sulaymani)." *Arab Law Quarterly* 5 no.3 (1990): 211.

<sup>3</sup> Hauter, Ashwak. "Fright and the Fraying of Community: Medicine, Borders, Saudi Arabia, Yemen." *Cultural Anthropology* 38, no.2 (2023): 204.

<sup>4</sup> Kola-Aderoju, Sekinat Adejoke. "The Muslim world and the development of science and technology: phase in history." *South Florida Journal of Development* 4, no.2 (2023), 748.

<sup>5</sup> Bruck, Gabriele vom. "Picturing Absence in Post-Revolutionary Yemen." In *Revolution Beyond the Event: The Afterlives of Radical Politics*, ed. Charlotte Al-Khalili, Narges Ansari, Myriam Lamrani, and Kaya Uzel (UCL Press, 2023), 43.

Semenjak itu, pengaruh Zaidiyah di Yaman kian hilang, dan berkembangnya pula pengaruh kuasa gerakan revolusi di negara itu. Bahkan, Saudi mula mengambil langkah yang baru dengan membentuk kerjasama bersama tampuk pimpinan yang baharu tersebut. Berikutan itu, hubungan antara Zaidiyah dengan Saudi mula goyah, lebih-lebih pembawakan baru Saudi yang lebih progresif dan moden serta bersifat liberal dengan dunia barat terutama Amerika Syarikat. Hal ini secara jelas boleh dilihat melalui Revolusi Iran 1979 apabila mereka dilihat lebih lunak dengan Amerika, dan memulaukan Syiah dan Iran.

Berikutan itu, hubungan Zaidiyah dan Saudi menemui noktah perdamaian, dan bertambah keruh pada awal kurun ke-21 apabila salah seorang tokoh fahaman Zaidiyah yang merupakan pemimpin tertinggi sebuah gerakan belia yang dikenali sebagai *as-Syabāb al-Mukmin* (Pemuda Mukmin) atau lebih dikenali dengan *Ansarullah* (Penolong Agama Allah)<sup>6</sup> iaitu Hussin Badr al-Din al-Houthi terkorban. Tragedi ini berlaku dalam serangan yang dilakukan oleh tentera rejim Ali Abdullah Saleh ketika pemimpin tersebut bersama rakyat Yaman melakukan demonstrasi bagi menyatakan bantahan terhadap pencerobohan yang dilakukan oleh sekutu Saudi, Amerika ke atas Iraq sejak tahun 2003. Sejak itu, gerakan Houthi mula berkembang dalam arean politik Yaman sebagai sebagai haluan kiri dalam memastikan kestabilan politik dan keadilan rakyat Yaman terbelah.

### **Serangan Arab Saudi ke atas Houthi (2011-2015)**

Tragedi pembunuhan Hussin Badr al-Din al-Houthi telah mendorong kepada kebangkitan gerakan Houthi khususnya dalam kalangan para belia rakyat Yaman ketika itu. Ramai daripada pengikutnya mula bertindak lebih agresif dan proaktif terhadap sebarang isu yang tidak memihak kepada mereka dan rakyat Yaman secara umumnya. Dalam hal ini, soal politik menjadi perhatian utama buat mereka. Hal ini memuncak pada Revolusi Rakyat Yaman pada tahun 2011 apabila tindakan Saudi mencampuri urusan internal pemerintahan Yaman. Hal ini melalui proses rundingan yang bersifat sebelah pihak sahaja tanpa berunding dengan kumpulan politik berhaluan kiri di peringkat nasional termasuk Houthi apabila Saudi melakukan rundingan terus dengan pihak kerajaan, dan menggesa agar Presiden Yaman pada ketika itu iaitu Ali Abdullah Saleh menyerahkan jawatannya kepada timbalannya iaitu Abdur Rabbuh Mansour al-Hadi. Tindakan Saudi tersebut juga dilihat tidak bersifat komprehensif, natijahnya mendatangkan amarah kepada Houthi walhasilnya membawa kepada intervensi politik Saudi ke atas Yaman bermula tahun 2013.

Nuansa campur tangan Arab Saudi dalam politik di Yaman berdasarkan pelan dan usaha mereka yang menaja Persidangan Dialog Nasional Yaman (*Hiwār al-Watāni fi al-Yaman*) atau (*National Dialogue Conference* (NDC)) pada Mac 2013. Tujuan dialog ini diadakan bagi mencari jalan perdamaian untuk meredakan suhu politik ketika itu. Namun begitu, hasil daripada dialog tersebut telah mendatangkan ketidakpuasan hati ramai pihak terutama Houthi. Hal ini ekoran, keputusan persidangan yang memuktamadkan jajaran baharu kuasa federal di Yaman tidak lagi tertumpu kepada Sana'a malah berkembang kepada enam wilayah utama. Hal ini sekaligus dianggap sebagai cubaan perluasan pengaruh kuasa federal di peringkat wilayah.<sup>7</sup>

---

<sup>6</sup> Almaliki, Osamah Mahmood. "Determinants of economic development amidst political instability: Yemen's case." (Master's thesis, İstanbul Gelişim Üniversitesi Lisansüstü Eğitim Enstitüsü, 2023), 2.

<sup>7</sup> "Yemen to become six-region federation," laman sesawang *Al-Jazeera*, diakses 19 Disember 2023 <https://www.aljazeera.com/news/2014/2/10/yemen-to-become-six-region-federation>

Ekoran itu, Houthi melakukan serangan ke atas pejabat Presiden Hadi di Sana'a dan menuntut agar parlimen dibubarkan segera, lalu berlakunya negosiasi yang memberikan ruang kepada Houthi menjadi sebahagian daripada ahli parlimen. Namun begitu, Hadi rasa tergugat kemudian bertindak melarikan diri ke wilayah selatan iaitu Aden dan menjadikannya sebagai pusat pemerintahan sementara. Kemudian, Hadi meminta pertolongan Saudi untuk menjadi mediator dalam masalah ini, namun Houthi membantah dan berang lalu mereka menyerang Hadi di Aden, kemudian memaksa beliau meminta suaka daripada Saudi. Susulan itu, bermulalah episod serangan ketenteraan Saudi secara langsung dan terang-terangan ke atas Houthi. Terdapat tiga serangan utama yang dilancarkan iaitu Operasi Ribut, Operasi Mengembalikan Harapan dan Operasi Panah Emas.

### **Operasi Ribut**

Pada tanggal 25 Mac 2015, Arab Saudi melancarkan Operasi Ribut yang juga dikenali sebagai *Asifatul Hazm*.<sup>8</sup> Serangan ini bermula di Sana'a yang merupakan markaz penyimpanan dan bekalan senjata milik kerajaan. Serangan tersebut berlaku selama hampir sebulan dengan melibatkan 100 jet pejuang Saudi dan dibantu oleh negara Arab yang lain terutama dari Majlis Kerjasama Taluk (*Gulf Cooperation Council* (GCC)), misalnya Emiriah Arab Bersatu (*United Arab Emirates* (UAE)) yang turut membantu dengan kapasiti jet sebanyak 30 buah.<sup>9</sup> Sepanjang tempoh serangan tersebut, ramai mangsa yang terkorban dan banyak kawasan yang ditawan oleh Houthi dilumpuhkan. Malahan juga, terdapat kawasan yang berjaya ditakluki semula seperti pangkalan terbesar milik Amerika Syarikat iaitu di al-Anad yang terletak di wilayah Lahij. Namun begitu, Saudi masih gagal merampas wilayah Aden sebaliknya hanya berjaya menawan sebahagiannya, dan mereka gagal juga mengembalikan pengaruh kuasa Hadi di Sana'a.<sup>10</sup> Kemudian, Saudi sekali bertindak melancarkan operasi seterusnya iaitu Operasi Mengembalikan Harapan (*'Amaliyah Ia'datuh al-'Amal*).

### **Operasi Mengembalikan Harapan**

Pada 22 April 2015, Arab Saudi melancarkan Operasi Mengembalikan Harapan<sup>11</sup> atau dikenali juga sebagai *'Amaliyah Ia'datuh al-'Amal*. Pada peringkat awalnya, operasi ini hanya melibatkan ketenteraan Hadi sahaja. Hal ini bertujuan bagi memberi laluan kepada kerajaan bagi memulihkan kembali keadaan dan membantu rakyat Yaman yang terkesan akibat operasi lepas. Namun begitu, Saudi bertindak melancarkan serangan.<sup>12</sup> Serangan kali ini lebih berskala besar apabila menyasarkan banyak wilayah yang dikesan di bawah pengaruh dan keberadaan Houthi. Wilayah-wilayah tersebut mencakupi bahagian selatan seperti pelabuhan di Aden, dan sekitarnya, dan bahagian utara terutama di markaz operasi Houthi di Sa'adah. Natijah daripada serangan ini, Saudi mendapat kecaman teruk daripada pelbagai pihak termasuk Pertubuhan Bangsa-Bangsa Bersatu (PBB). Lantas, keadaan ini mendorong kepada gencatan senjata, namun naratif ini tidak bertahan lama kerana terdapat sebuah serangan di bandar Taiz, dan Saudi meyakini bahawa ia serangan yang dilakukan oleh Houthi walhal tidak, sebaliknya ia adalah serangan yang dilakukan oleh pejuang *Islamic State*

---

<sup>8</sup> Walsh, Tom. "Securitisation imperatives and the exaggeration of Iranian involvement with the Houthi movement by international actors." *Global Policy* 14, no.2 (2023): 385.

<sup>9</sup> Stenslie, Stig. "Decisive Storm": Saudi Arabia's attack on the Houthis in Yemen." *Norwegian Peacebuilding Resource Center* 1 (2015): 2.

<sup>10</sup> Hanson, Curtis, "Counterinsurgency in Yemen: Assessing operations decisive storm, restoring hope, and golden arrow," (Master project, Capstone and Graduation Projects, The American University in Cairo, 2016), 20.

<sup>11</sup> Mutschler, Max, and Marius Bales. "Liquid or Solid Warfare? Autocratic States, Non-State Armed Groups and the Socio-Spatial Dimension of Warfare in Yemen." *Geopolitics* (2023): 17.

<sup>12</sup> "Fresh Saudi-led air strikes reported in Yemen," laman sesawang *Al-Jazeera*, diakses 19 Disember 2023, <https://www.aljazeera.com/news/2015/4/22/fresh-saudi-led-air-strikes-reported-in-yemen>

(IS).<sup>13</sup> Lantas, peperangan kembali berlaku, dan kali ini Saudi melancarkan operasi yang lebih berskala besar yang dikenali sebagai “Operasi Panah Emas” (*‘Amaliyah Sahm Zahbi*).

### **Operasi Panah Emas**

Pada 14 Julai 2015, Arab Saudi melancarkan serangan fasa ke-3 iaitu Operasi Panah Emas atau dikenali sebagai *‘Amaliyah Sahm Zahbi*.<sup>14</sup> Operasi ini lebih agresif kerana serangan kali ini bertujuan untuk menakluki semula Aden yang belum dikuasai sepenuhnya oleh Saudi semenjak operasi pertama dilancarkan pada Mac 2015. Hal ini diakui sendiri oleh Wahed al-Obali yang merupakan jurucakap bagi operasi tersebut bahawa operasi kali ini akan memastikan agar Aden ditakluk kembali sepenuhnya. Oleh sebab itu, serangan kali ini lebih memfokuskan kepada bahagian darat (*ground*), dan Saudi mempertingkatkan jumlah tentera sebanyak 900, dan 600 daripadanya ditugaskan untuk membantu dalam menawan bahagian jalan utama menuju ke Bandar Aden, manakala 300 lagi ditugaskan untuk menawan pelabuhan Aden. Pada 18 Julai 2015, akhirnya Saudi berjaya menawan semula Aden dan kawalan dipertingkatkan dengan aset dan kelengkapan perang yang cukup termasuk bantuan pasukan khas dari UAE.<sup>15</sup> Walaupun begitu, Saudi masih gagal untuk mengembalikan semula pemerintahan Hadi di Sana’a.

### **Kesan Serangan Arab Saudi Ke Atas Yaman**

Politik adalah satu mekanisme yang mengurus dan membentuk kehidupan manusia. Oleh sebab itu, kegagalan menguruskan politik pastinya memberi kesan yang negatif kepada manusia sama ada secara individu mahupun secara umum. Justeru, indikator untuk meletakkan justifikasi yang adil dalam isu serangan Arab Saudi ke atas Yaman ini adalah melihat kepada sejauh mana peranan Saudi dalam memberi impak kepada pembentukan dan pengukuhan nilai *Good Governance* (Pemerintahan yang Baik) kepada kerajaan Yaman dan rakyatnya. Di samping itu, wajar juga mengambil kira soal keterbukaan dan kebebasan demokrasi yang telah dijamin bagi sesebuah negara yang berdaulat dan menjunjung nilai *Human Right* (Hak Asasi Manusia) dan nilai *Equal Right* (Hak Sama Rata). Pandangan ini dinyatakan oleh Bekas Setiausaha Agung PBB iaitu Boutros Boutros Ghali seperti berikut:

*“...democracy is a thread which runs through all the work of the organization and that human rights, equal rights and government under law are important attributes of democracy”.*<sup>16</sup>

Justeru, apa yang berlaku ke atas Houthi jelas boleh dirumuskan sebagai sebuah tindakan yang tidak cermat. Hal ini kerana tindakan tersebut secara tidak langsung menyekat suara

---

<sup>13</sup> “The war in Yemen: the entry into force of the humanitarian truce, and the coalition warns the Houthis of violating it,” laman sesawang *BBC News*, diakses 19 Disember 2023, [https://www.bbc.com/arabic/middleeast/2015/05/150512\\_yemen\\_truce\\_warning](https://www.bbc.com/arabic/middleeast/2015/05/150512_yemen_truce_warning)


<sup>14</sup> Mohamed Bassiouni, Abdel Halim. "الحوثيين" نفوذ "الحوثيين": مستقبل الصراع اليمني بعد تراجع نفوذ "الحوثيين".<sup>16</sup>

<sup>15</sup> Knights, Michael. “The Saudi-UAE War Effort in Yemen (Part 1): Operation Golden Arrow in Aden”, *The Washington Institute the Near East Policy*, diakses 19 Disember 2023, <https://www.washingtoninstitute.org/policy-analysis/saudi-uae-war-effort-yemen-part-1-operation-golden-arrow-aden>

<sup>16</sup> Ogunbanjo, Martin Abimbola, and Modupe Oluremi Albert. "GLOBALISATION, DEMOCRACY AND HUMAN RIGHTS." *JOURNAL OF POLITICAL AND ADMINISTRATIVE STUDIES (JPAS) UNIVERSITY OF PORT HARCOURT* no.4 (2023): 23.

demokrasi Houthi dan pihak yang tidak bersetuju dengan kerajaan Yaman ketika itu. Lebih menyedihkan apabila serangan tersebut adalah serangan bersasar yang bukan sahaja menyasarkan kawasan Houthi malahan orang awam yang tinggal di sekitar situ. Buktinya, kajian ini menemukan satu laporan yang boleh dipercayai yang dikeluarkan oleh *Human Right Watch*, sebuah badan bebas yang berautoriti di peringkat global dalam isu kemanusiaan. Mereka menyatakan bahawa serangan Saudi adalah begitu bersasar dan terancang. Mereka melaporkan bahawa serangan bagi Operasi Ribut sahaja telah pun mengorbankan sekurang-kurangnya 27 ahli keluarga, dan 17 daripadanya merupakan kanak-kanak. Malahan juga, mereka memusnahkan bangunan sekolah dan stesen minyak di wilayah Sa'adah.<sup>17</sup>

Rajah 1. Serangan Udara Arab Saudi di Sa'adah sejak 29 Mac-19 Mei 2015.



Kesan semua serangan di atas telah mmberiksan kesan berpanjangan kepada jutaan rakyat Yaman. Sehingga Disember 2023, PBB merekodkan bahawa jumlah rakyat Yaman yang terkesan dan memerlukan bantuan segera adalah seramai 21.6 juta orang.<sup>18</sup> Sehubungan dengan itu, kesan tersebut boleh dilihat kepada aspek utama iaitu pertama, ketidakstabilan politik, kedua kemelesetan ekonomi dan ketiga kemunduran rakyat.

### Ketidakstabilan Politik

Serangan Saudi ke atas Houthi pada tahun 2015 adalah satu bentuk tindakan yang jelas menggugat kedudukan dan kestabilan politik di Yaman. Hal ini kerana, tindakan yang diambil oleh Saudi tersebut jelas menutup suara rakyat Yaman secara umumnya dan hak kumpulan Houthi secara khususnya bagi mendapatkan hak mereka yang sekian lama ditindas oleh

<sup>17</sup> "Targeting Saada Unlawful Coalition Airstrikes On Saada City in Yemen", *Human Right Watch*, diakses 19 Disember 2023, <https://www.hrw.org/report/2015/06/30/targeting-saada/unlawful-coalition-airstrikes-saada-city-yemen>

<sup>18</sup> Center for Prevention Action, "War in Yemen", *Council of Foreign Relations (cfr)*, diakses 19 Disember 2023, <https://www.cfr.org/global-conflict-tracker/conflict/war-yemen>

kerajaan. Sejak itu, senario Yaman dilihat sebagai sebuah negara yang hilang identiti dan ruang untuk mereka merancang dan menstruktur kedudukan politik mereka sendiri. Hal ini sekaligus mencengkam kebebasan politik mereka, dan ianya dilihat sebagai satu usaha secara tidak langsung Saudi dalam mengawal citra politik di Yaman secara khusus baik di bahagian utara mahupun di bahagian selatan Yaman.

Oleh kerana itu, kajian ini melihat bahawa tindakan Saudi yang memaksa pihak Houthi dan parti-parti haluan kiri seperti Parti Sosialis Yaman supaya menerima resolusi Dialog Nasional (NDC) pada tahun 2013 adalah satu langkah untuk mengukuhkan pengaruh mereka. Sedangkan, beberapa resolusi yang dimuktamadkan itu tidak cukup inklusif dan tidak meraikan nilai federalisme itu sendiri yang seharusnya memenuhi kebajikan negeri (*state*) dan membentuk hubungan yang lebih harmoni dengan mereka. Misalnya, cubaan memisahkan dan mengecilkan skop kuasa di peringkat negeri dengan meletakkan wilayah-wilayah penting di bawah kuasa Presiden. Hal ini jelas melalui pembentukan enam wilayah federal yang baharu dan tidak lagi hanya tertumpu kepada Sana'a semata-mata. Malahan juga, tindakan ini dilihat sebagai satu usaha untuk mengagihkan kekayaan alam secara tidak sekata. Hal ini kerana salah satu wilayah federal baharu yang dibentuk adalah wilayah Azal yang mana terletaklah wilayah Sa'adah yang merupakan wilayah tradisi dan autonomi bagi masyarakat Houthi bagi menjalankan aktiviti ekonomi harian mereka.<sup>19</sup>

Selain itu, serangan yang dicetuskan oleh Saudi juga mendorong kepada campurtangan kuasa asing ke atas Yaman. Hal ini sekaligus mengheret Yaman ke dalam peperangan proksi yang menyebabkan politik di Yaman berpecah kepada dua blok utama. Blok pertama melibatkan koalisi Saudi yang terdiri daripada kerajaan Yaman, negara Majlis Teluk (GCC) dan kuasa dunia Barat iaitu Amerika Syarikat, United Kingdom, Britain, Kanada, Perancis, Itali dan beberapa lagi, manakala blok kedua pula dianggotai Houthi, Iran, Russia. Terdapat juga blok serpihan di wilayah selatan Yaman iaitu gabungan politik antara Parti Sosialis Yaman (*Yemen Socialist Party* (YSP)) dengan Emeriah Arab Bersatu (UAE). Keadaan menjadi lebih kompleks apabila kerjasama ini bertindak menentang koalisi Saudi sedangkan UAE yang merupakan sebahagian daripada keanggotaan GCC.

Naratif di atas boleh difahami kerana jajaran politik awal di Yaman sebenarnya terbahagi kepada dua wilayah utama iaitu bahagian utara dan bahagian selatan sebelum mereka bersatu pada tahun 1990. Bahagian utara dahulunya dikuasai dan dikenali sebagai Yemen Arab Republic (YAR), manakala bahagian selatan pula dikuasai oleh kuasa sosialis iaitu People's Democratic of Republic of Yemen (PDRY). Setelah bersatu menjadi negara Yaman Republik, penduduk asal PDRY tidak mendapat keadilan dan hak yang sepatutnya oleh kerajaan apabila hak asasi mereka didiskriminasi, maka mereka bangkit menuntut untuk kembali berpisah dan merdeka dari kuasa federal, namun kerajaan enggan. Lantaran itu, keadaan ini berterusan sehingga keadaan bergolak lalu memuncak sewaktu serangan Saudi ke atas Houthi di Aden pada tahun 2015, dan mereka terpaksa berkejasama dengan UAE untuk berdepan dengan koalisi Saudi. Motif bantuan UAE tersebut atas dasar kepentingan tertentu dan perkara ini dibahaskan oleh ramai pihak, dan dapatan kajian ini mendapati bahawa faktor terbesarnya adalah soal ekonomi kerana Aden merupakan wilayah selat yang menempatkan pelabuhan yang strategik, dan di sana juga terdapat sebuah pusat pelancongan yang bersejarah iaitu di Kepulauan Socotra.<sup>20</sup>

---

<sup>19</sup> Thiel, Tobas. "Yemen Imposed Federal Boundaries", *Middle East Research and Information Project (MERIP)*, diakses 19 Disember 2023, <https://merip.org/2015/07/yemens-imposed-federal-boundaries/>

<sup>20</sup> Ramadhan, Riskiansyah, Syaiful Rohman, and Imam Khomaeni Hayatullah. "Devide Et Impera: The United Arab Emirates' Strategic Policy In Yemen." *Journal Middle East and Islamic Studies* 8, no.2 (2023):10.

## Kemelesetan Ekonomi

Serangan Arab Saudi telah mengakibatkan pertumbuhan ekonomi Yaman menjadi lembap dan nilai pasaran mata wang Riyal Yaman (YRI) kian merosot. Hal ini disebabkan oleh aktiviti ekonomi di semua sektor ekonomi baik di peringkat kerajaan mahupun peringkat swasta yang terpaksa dihentikan akibat terpaksa menanggung kerugian yang besar. Keadaan ini melibatkan prasarana infrastuktur dan aset utama mereka seperti kilang dan hab perdagangan yang musnah sepenuhnya. Anggaran nilai kerugian secara purata adalah bernilai US Dolar 14 bilion.<sup>21</sup> Perkiraan nilai yang besar ini disumbang oleh kemerosotan mendadak sektor minyak yang merupakan antara penyumbang terbesar kepada ekonomi negara Yaman.<sup>22</sup>

Hal tersebut turut didedahkan oleh sebuah dapatan kajian pusat kajian dalam industri tenaga dan komoditi yang berpangkalan di London iaitu S&P Global Platts Analytics yang menyatakan bahawa sebelum konflik tercetus, Yaman mampu menghasilkan minyak sebanyak 300,000 sehingga 400,000 barel per hari. Namun begitu, naratifnya kini berbeza apabila Yaman hanya berupaya menghasilkan sejumlah 50,000 barel per hari.<sup>23</sup> Keadaan ini sekaligus mendatangkan kebimbangan kepada para pemain industri saham dalam melabur ke dalam sektor perindustrian ini sehingga mereka terpaksa memilih menarik diri daripada menanggung defisit yang lebih kritikal, dan naratif ini sekaligus mendorong kepada kenaikan harga minyak yang melambung.

Sehubungan itu, keadaan tersebut secara tidak langsung memberi implikasi besar kepada bacaan tahunan Keluaran Dalam Negeri Kasar (KDNK) Yaman sejak serangan 2015. Hal ini merujuk kepada sumber yang dikeluarkan oleh Kementerian Perancangan dan Operasi Antarabangsa Yaman yang menyatakan bahawa pertumbuhan sektor minyak dan gas merosot sebanyak kira-kira -75.7 peratus. Hal ini menyumbang kepada penguncupan KDNK kira-kira 34.6 peratus. Rekod ini adalah yang terburuk dalam sejarah. Naratif yang sama, laporan yang dihasilkan oleh sebuah institusi penerbitan jurnal di peringkat global iaitu Macrothink Institute yang juga menyatakan bahawa tempoh bagi tahun 2015 sehingga tahun 2016 adalah satu tempoh puncak (*peak period*) kepada kejatuhan ekonomi Yaman.<sup>24</sup>

Selain daripada mempengaruhi KDNK, krisis sektor minyak juga mempengaruhi kadar inflasi.<sup>25</sup> Hal ini sekaligus mendorong kepada kenaikan harga barangan dan secara tidak langsung mempengaruhi kehilangan kuasa membeli isi rumah. Dalam erti kata lain, mereka hanya boleh membeli dengan jumlah barangan yang sama atau kurang daripada itu. Jadi, perkara ini secara tidak langsung mendorong kepada penurunan gaji para pekerja dan penurunan taraf hidup mereka.

---

<sup>21</sup> Abdulkader, Maram. "The Forgotten War: Yemen and Human Security." *Journal of Global Faultlines* 10, no.1 (2023): 52.

<sup>22</sup> Almaliki, Osamah Mahmood. "Determinants of economic development amidst political instability: Yemen's case." (Master diss., İstanbul Gelişim Üniversitesi Lisansüstü Eğitim Enstitüsü, 2023), 28.

<sup>23</sup> Mitchell, Charlie. "Yemen seen as new flash point for nervous oil markets: analysts," laman sesawang *S&P Global Community Insights*, diakses 5 November 2023, <https://shorturl.at/dyJOR>

<sup>24</sup> Alomaisi, Najeeb. "Political Instability and Economic Growth in the State of Yemen Analysis Study." *Journal of Public Administration and Governance* 10, no.2 (2020): 247.

<sup>25</sup> Maghdid, Rekurd S., Aso K. Omer, and Brwa Sardar Ahmad. "Issues and Crises Emerging from Managing Natural Resources (Oil and Gas) in the Developing Countries." *Polytechnic Journal of Humanities and Social Sciences* 4, no. 2 (2023): 690.



Selain itu, naratif di atas boleh difahami dengan realiti yang terpaksa didepani oleh sektor Perusahaan Kecil dan Sederhana (PKS) yang berperanan menjadi penyumbang kepada ekonomi Yaman khususnya di Sana'a dan Aden yang turut terkesan terutama di peringkat pembekal iaitu dalam perniagaan, perindustrian dan perkilangan.<sup>26</sup> Mereka terpaksa meminimumkan segala bentuk aktiviti mereka, kemudian mengenakan harga produk yang lebih tinggi kepada pihak kedua seperti pemborong. Berikutan hal tersebut, perusahaan mikro seperti peniaga restoran dan kedai runcit menjadi mangsa situasi, dan mereka turut terpaksa meletakkan harga yang tinggi kepada pengguna, dan secara langsung ini membebaskan pihak pengguna khususnya golongan miskin.

Oleh sebab demikian, naratif di atas menyumbang kepada kerencatan dan membantutkan proses kitaran ekonomi (*economic cycle*) dalam kalangan setiap lapisan masyarakat baik di peringkat kerajaan mahupun di peringkat rakyat. Akibatnya, pihak-pihak tersebut mengalami kerugian dan operasi mereka terpaksa dihentikan serta secara tidak langsung meningkatkan kadar kehilangan pekerjaan di negara tersebut yang sedia kritikal.<sup>27</sup>

### **Kemunduran Rakyat**

Paras kelangsungan hidup rakyat Yaman cukup kritikal sejak serangan Arab Saudi pada tahun 2015. Mereka mengalami defisit sosial yang cukup membimbangkan. Naratif ini boleh dilihat dengan keadaan negara itu yang kini berdepan dengan krisis kemanusiaan terburuk di dunia malah mengatasi negara-negara termiskin di dunia seperti Nigeria dan Sudan. Senario ini dapat dibuktikan merusi laporan oleh PBB yang menyatakan bahawa Yaman kini berdepan dengan krisis kemanusiaan terteruk dengan lebih 4 juta orang terpaksa hilang tempat tinggal (*homeless*) dan lebih 20 juta begitu memerlukan bantuan segera (*emergency assessment*) seperti perubatan, makanan dan bekalan air bersih.<sup>28</sup>

Kajian ini juga mendapati bahawa lebih ramai lagi rakyat Yaman yang bakal terkesan sekiranya serangan dari pihak Saudi tidak dihentikan. Asas ini berasaskan kepada indikator utama iaitu Masa Depan Antarabangsa (*International Futures* (IFs)) yang dikemukakan oleh seorang sarjana barat terkemuka dalam kajian lapangan antarabangsa iaitu Profesor Barry B. Huges yang menunjukkan bahawa naratif penderitaan rakyat Yaman adalah meliputi segenap aspek sosiologi, dan salah satu daripadanya adalah isu ketirisan makanan dan kebuluran.

Isu tersebut adalah antara masalah yang teruncing berikutan serangan berterusan. Hal ini disebabkan oleh soal sekuriti makanan dan soal kebersihan dan sanitasi mengalami krisis yang teruk bahkan terteruk di dunia berikutan sekatan bekalan makanan, monopoli harga, kenaikan dan ketidak kawalan harga barangan dan kemusnahan infrastruktur air. Hal sebegini

---

<sup>26</sup> Saleh, M. A. K., and K. R. Manjunath. "Small and medium enterprises in Yemen: A financial aspect investigation." In *International EUROASIA Congress on Scientific Researches and Recent Trends-7*. Vol.1 (Azerbaijan: Baku Euroasian University, 2020): 410.

<sup>27</sup> Alsharif, Radhwan, Yasmeen Mohammed Alhaimi, Ahmed Alroba'ee, and Yusef Alraymi. *Diagnostic tools for improving education policy planning: a case study on yemen girls dropout in primary education in emergencies* (Switzerland: Network for International Policies and Cooperation in Education and Training (NORRAG), 2023), 9.

<sup>28</sup> "Yemen Crisis Explained," laman sesawang *USA for UNCHR The UN Refugee Agency*, diakses 20 Disember 2023, <https://www.unrefugees.org/news/yemen-crisis-explained/>

sekaligus menjadi beban yang besar buat rakyat Yaman khususnya yang tinggal di pedalaman.<sup>29</sup>

Oleh sebab itu, rekod kes penyakit yang menghidap masalah malnutrisi akut meningkat setiap tahun, dan golongan paling terkesan dalam krisis ini adalah kanak-kanak di bawah usia 5 tahun dan secara tidak langsung merencatkan proses ketumbuhan mereka. Selain itu, penyakit ini juga menyebabkan kebolehhajatan penyakit merbahaya yang lain seperti diarea, radang paru-paru dan demam campak yang boleh menyumbang kepada maot.<sup>30</sup> Dalam dapatan lain, UNICEF iaitu sebuah agensi khas di bawah PBB dalam isu kanak-kanak menemui bahawa kebolehmajian kanak-kanak akibat daripada masalah ini boleh terjadi dengan masa yang begitu singkat iaitu dalam kadar 10 minit sahaja.<sup>31</sup>

Selain kanak-kanak, golongan wanita juga turut terkesan dengan masalah akut tersebut terutama golongan ibu hamil akibatnya mengancam nyawa bayi yang berada dalam kandungan mereka. Kes ini berdasarkan dapatan kajian yang dikeluarkan oleh sebuah badan bukan kerajaan yang memfokuskan isu kebuluran di peringkat global iaitu The Borgen Project yang menyatakan bahawa nisbah kematian bagi kelahiran baru begitu tinggi iaitu tidak kurang daripada 50 peratus bagi setiap 1000 kelahiran baru.<sup>32</sup>

Selain daripada isu kebuluran, isu kemiskinan juga merupakan antara isu terpenting akibat daripada serangan yang berlaku. Hal ini ketara berikutan dapatan kajian mendapati bahawa angka kemiskinan mengalami peningkatan setiap tahun terutama pada pasca konflik 2015. Senario ini berdasarkan data yang dikeluarkan oleh Bank Dunia yang menyatakan bahawa kemiskinan di Yaman pada tahun 2016 yakni pasca Operasi Panah Emas meningkat kepada 78 peratus berbanding 62 peratus pada tahun 2014.<sup>33</sup>

Oleh kerana itu, hal tersebut memberi kesan kepada ibu bapa dalam memberikan pendidikan kepada anak-anak mereka kerana ketidakmampuan untuk mereka menanggung kos persekolahan dan pengajian anak-anak mereka. Lantaran itu, keadaan ini memaksa ibu bapa untuk menyuruh anak-anak mereka mencari pekerjaan bagi menyara kehidupan mereka sekeluarga. Perkara ini sekaligus memberikan gambaran yang jelas bahawa Yaman ketinggalan jauh dalam aspek pendidikan dan secara langsung boleh menjurangkan lagi kadar celik berbanding negara-negara Arab yang lain.

Selain itu, serangan Saudi juga mengakibatkan peluang pekerjaan semakin terhad dan ramai terpaksa yang menganggur. Dapatan kajian mendapati bahawa taraf pengangguran di negara tersebut mengalami ketidakstabilan yang ketara khususnya pada tahun 2015 dengan peratusan 22.1 peratus, kemudian naratif ini kian memburuk sehingga 34 peratus pada tahun 2020.<sup>34</sup> Antara kelompok yang paling terkesan adalah golongan belia, sama ada di bandar

---

<sup>29</sup> "Assessing the impact of war in Yemen on achieving the sustainable development goals | United Nations in Yemen," laman sesawang *United Nations Yemen*, diakses 20 Disember 2023, <https://yemen.un.org/en/19044-assessing-impact-war-yemen-achieving-sustainable-development-goals>

<sup>30</sup> Dureab, Fekri, et al. "An overview on acute malnutrition and food insecurity among children during the conflict in Yemen." *Children* 6.6 (2019): 2.

<sup>31</sup> "Every 10 minutes a child dies in Yemen," laman sesawang *United Nations Children's Fund (UNICEF)*, diakses 21 Disember 2023, <https://shorturl.at/aefQ0>

<sup>32</sup> "Poverty In Yemen - The Borgen Project," laman sesawang *The Borgen Project*, diakses 21 Disember 2023, <https://borgenproject.org/tag/poverty-in-yemen/>

<sup>33</sup> "Yemen Poverty Notes," laman sesawang *World Bank*, diakses 21 Disember 2023, <https://shorturl.at/ajoX4>

<sup>34</sup> Jenny Marlar, "Global Unemployment at 8% In 2011", laman sesawang *GALLUP*, diakses 21 Disember 2023, <https://News.Gallup.Com/Poll/153884/Global-Unemployment-2011.aspx>

mahupun di luar bandar. Hal ini berdasarkan laporan yang dikeluarkan oleh Kementerian Perancangan dan Kerjasama Antarabangsa Yaman bahawa belia adalah penyumbang terbesar dalam masalah penggangguran ini. Maka, tidak hairanlah golongan belia dan rakyat Yaman yang lain terpaksa mengemis di negara mereka sendiri serta ada yang terpaksa berpindah keluar daripada rumah mereka dan sebahagian dalam kalangan mereka menjadi pelarian di seluruh dunia.

Sehingga tahun 2020 sahaja, Pesuruhjaya Tinggi Bangsa-Bangsa Bersatu untuk Pelarian (*Office of the United Nations High Commissioner for Refugees (UNHCR)*) merekodkan bahawa Yaman menduduki tempat ke-4 dunia sebagai salah sebuah negara tertinggi yang berdepan dengan masalah kehilangan tempat tinggal dengan jumlah seramai 177 ribu orang. Kemudian, tahun 2023 mencatatkan peningkatan mereka yang *homeless* sejumlah 4 juta orang, dan 66 peratus daripadanya bergantung kepada bantuan kemanusiaan segera.<sup>35</sup>

## **Rumusan**

Konflik Yaman merupakan sebuah senario jelas yang menunjukkan bahawa Yaman sedang berhadapan dengan krisis kemanusiaan terburuk di dunia. Situasi ini bukan sahaja menimpa penduduk dalam negara Yaman tersebut malah kepada pelarian Yaman juga. Mereka akan terdedah dan terperangkap dengan aktiviti jenayah di luar sana seperti pemerdagangan manusia, jenayah seksual, pembunuhan dan pelbagai lagi yang pastinya mencabul hak asasi mereka sebagai seorang manusia. Oleh sebab demikian, tidak hairan mengapa pelarian dianggap sebagai antara kumpulan manusia yang paling terancam di dunia.<sup>36</sup>

Lebih menyedihkan lagi, apabila pelarian Yaman dipandang rendah oleh masyarakat dunia, dan hal ini mendorong kepada budaya xenophobia iaitu perasaan tidak selesa dan prejudis dalam diri mereka terhadap pelarian Yaman yang datang berhijrah ke negara mereka. Keadaan mereka menjadi lebih tertekan apabila banyak negara-negara luar yang tidak menawarkan suaka ke atas mereka, dan tidak mengiktiraf status pelarian mereka termasuk Malaysia. Hal ini kerana Malaysia antara negara yang tidak meratifikasi Konvensyen Pelarian 1951 atau Protokol 1967 yang merupakan satu bentuk perjanjian bertujuan melindungi dan mengurus isu-isu berkaitan pelarian.<sup>37</sup> Keadaan ini pastinya lebih mencabar buat mereka kerana implikasi tidak meratifikasi konvensyen terbabit adalah berat buat mereka. Hal ini kerana mereka tidak mampu bekerja malah ianya dikira sebagai sebuah jenayah dan boleh dikenakan tindakan undang-undang.

Oleh kerana itu, kajian ini melihat bahawa serangan Saudi yang berlaku cukup memberi kesan kepada kehidupan rakyat Yaman secara keseluruhan. Justeru, pihak-pihak yang terlibat dan berautoriti seperti Pertubuhan Bangsa-Bangsa Bersatu (PBB), Liga Arab dan Pertubuhan Kerjasama Islam (*Organisation of Islamic Cooperation (OIC)*) perlu segera menilai kembali pelan dan tindakan yang boleh diambil secara harmoni demi kebaikan negara Yaman. Malah, setiap tindakan yang diambil haruslah mengambil kira soal keadilan dan soal

---

<sup>35</sup> Ahmad, Hilal, and Imam Hanafi. "The Yemeni Civil War's Impact on The Socio-Cultural Conditions of the People in Yemen." *Jurnal Tapis: Jurnal Teropong Aspirasi Politik Islam* 19, no. 1 (2023): 147.

<sup>36</sup> Ather, Rashida. "The Global Refugee Crises: Study of Contemporary Issues and Challenges." *Palarch's Journal of Archaeology of Egypt/Egyptology* 17, no.6 (2020): 8134.

<sup>37</sup> Razali, Rodziana, Zulfaqar Mamat, Sarah Adibah Hamzah, Wan Abdul Fattah Wan Ismail, Tasneem Rahmatullah, and Asmaa Arinah Zulkifli. "Refugees in Malaysia: Protection Framework, Challenges and Implications." *Malaysian Journal of Syariah And Law* 9, no.2 (2021): 157.

transparansi buat seluruh rakyat Yaman tanpa mengambil kira soal latar belakang politik, fahaman mahupun agama.

Selain itu, kesatuan politik di Yaman perlu segera diperbaiki baik di peringkat nasional mahupun serantau. Tidak mustahil, jika naratif ini berlarutan maka, kestabilan dan kemampanan politik di Yaman kian sukar dicapai dan membuka ruang kepada campur tangan kuasa asing lain yang turut berkepentingan. Soal siapa benar atau salah itu bukannya satu-satu perkara utama yang perlu diambil kira dan perhatian, malah ianya lebih melihat kepada soal impaknya. Hal ini kerana Yaman berhak menentukan hala tuju negaranya sendiri tanpa pnglibatan mana-mana kuasa asing terutama di peringkat politik kerana kesannya begitu besar kepada soal kestabilan politik, soal kemampanan ekonomi dan soal pembangunan sosial negara mereka.

## **RUJUKAN**

“Assessing the impact of war in Yemen on achieving the sustainable development goals | United Nations in Yemen,” laman sesawang *United Nations Yemen*, diakses 20 Disember 2023, <https://yemen.un.org/en/19044-assessing-impact-war-yemen-achieving-sustainable-development-goals>

“Targeting Saada Unlawful Coalition Airstrikes On Saada City in Yemen”, *Human Right Watch*, diakses 19 Disember 2023, <https://www.hrw.org/report/2015/06/30/targeting-saada/unlawful-coalition-airstrikes-saada-city-yemen>

“Fresh Saudi-led air strikes reported in Yemen,” laman sesawang *Al-Jazeera*, diakses 19 Disember 2023, <https://www.aljazeera.com/news/2015/4/22/fresh-saudi-led-air-strikes-reported-in-yemen>

“Poverty In Yemen - The Borgen Project,” laman sesawang *The Borgen Project*, diakses 21 Disember 2023, <https://borgenproject.org/tag/poverty-in-yemen/>

“The war in Yemen: the entry into force of the humanitarian truce, and the coalition warns the Houthis of violating it,” laman sesawang *BBC News*, diakses 19 Disember 2023, [https://www.bbc.com/arabic/middleeast/2015/05/150512\\_yemen\\_truce\\_warning](https://www.bbc.com/arabic/middleeast/2015/05/150512_yemen_truce_warning)

“Yemen Crisis Explained,” laman sesawang *USA for UNCHR The UN Refugee Agency*, diakses 20 Disember 2023, <https://www.unrefugees.org/news/yemen-crisis-explained/>

“Yemen Poverty Notes,” laman sesawang *World Bank*, diakses 21 Disember 2023, <https://shorturl.at/ajoX4>

Abdulkader, Maram. “The Forgotten War: Yemen and Human Security.” *Journal of Global Faultlines* 10, no.1 (2023): 43-57.

Ahmad, Hilal, and Imam Hanafi. "The Yemeni Civil War's Impact on The Socio-Cultural Conditions of the People in Yemen." *Jurnal Tapis: Jurnal Teropong Aspirasi Politik Islam* 19, no. 1 (2023): 145-158.

Almaliki, Osamah Mahmood. "Determinants of economic development amidst political instability: Yemen's case." Master's thesis, İstanbul Gelişim Üniversitesi Lisansüstü Eğitim Enstitüsü, 2023.

Almaliki, Osamah Mahmood. "Determinants of economic development amidst political instability: Yemen's case." Master diss., İstanbul Gelişim Üniversitesi Lisansüstü Eğitim Enstitüsü, 2023.

Alomaisi, Najeeb. "Political Instability and Economic Growth in the State of Yemen Analysis Study." *Journal of Public Administration and Governance* 10.2 (2020): 233-260.

Alsharif, Radhwan, Yasmeeen Mohammed Alhaimi, Ahmed Alroba'ee, and Yusef Alraymi. *Diagnostic tools for improving education policy planning: a case study on yemen girls dropout in primary education in emergencies*. Switzerland: Network for International Policies and Cooperation in Education and Training (NORRAG), 2023.

Ather, Rashida. "The global refugee crises: study of contemporary issues and challenges." *PalArch's Journal of Archaeology of Egypt/Egyptology* 17, no. 6 (2020): 8130-8138.

Bruck, Gabriele vom. "Picturing Absence in Post-Revolutionary Yemen." In *Revolution Beyond the Event: The Afterlives of Radical Politics*, edited by Charlotte Al-Khalili, Narges Ansari, Myriam Lamrani, and Kaya Uzel, 43–72. UCL Press, 2023. <https://doi.org/10.2307/j.ctv32bm0v5.8>.

Center for Prevention Action, "War in Yemen", *Council of Foreign Relations (cfr)*, diakses 19 Desember 2023, <https://www.cfr.org/global-conflict-tracker/conflict/war-yemen>

Dureab, Fekri, et al. "An overview on acute malnutrition and food insecurity among children during the conflict in Yemen." *Children* 6, no.6 (2019): 1-8.

Ghanem, Isam. "The Legal History of A Sir (Al-Mikhlaḥ Al-Sulaymani)." *Arab Law Quarterly* 5, no. 3 (1990): 211-214.

Hanson, Curtis, "Counterinsurgency in Yemen: Assessing operations decisive storm, restoring hope, and golden arrow." Master project, Capstone and Graduation Projects, The American University in Cairo, 2016.

Hauter, Ashwak. "Fright and the Fraying of Community: Medicine, Borders, Saudi Arabia, Yemen." *Cultural Anthropology* 38, no. 2 (2023): 198-224.

Jenny Marlar, "Global Unemployment at 8% In 2011", laman sesawang *GALLUP*, diakses 21 Desember 2023, <https://News.Gallup.Com/Poll/153884/Global-Unemployment-2011.AspX>

Knights, Michael. "The Saudi-UAE War Effort in Yemen (Part 1): Operation Golden Arrow in Aden", *The Washinton Institute the Near East Policy*, diakses 19 Desember 2023, <https://www.washingtoninstitute.org/policy-analysis/saudi-uae-war-effort-yemen-part-1-operation-golden-arrow-aden>

Kola-Aderoju, Sekinat Adejoke. "The Muslim world and the development of science and technology: phase in history." *South Florida Journal of Development* 4, no. 2 (2023): 737-754.

Maghdid, Rekurd S., Aso K. Omer, and Brwa Sardar Ahmad. "Issues and Crises Emerging from Managing Natural Resources (Oil and Gas) in the Developing Countries." *Polytechnic Journal of Humanities and Social Sciences* 4, no. 2 (2023): 687-694.

Mitchell, Charlie. "Yemen seen as new flash point for nervous oil markets: analysts," laman sesawang *S&P Global Community Insights*, diakses 5 November 2023, <https://shorturl.at/dyJOR>

Mohamed Bassiouni, Abdel Halim. "نداعيات "السهم الذهبي": مستقبل الصراع اليمني بعد تراجع نفوذ "الحوثيين", عدن الغد, diakses 19 Disember 2023, <https://shorturl.at/rJLO>

Mutschler, Max, and Marius Bales. "Liquid or Solid Warfare? Autocratic States, Non-State Armed Groups and the Socio-Spatial Dimension of Warfare in Yemen." *Geopolitics* (2023): 1-29.

Ogunbanjo, Martin Abimbola, and Modupe Oluremi Albert. "GLOBALISATION, DEMOCRACY AND HUMAN RIGHTS." *JOURNAL OF POLITICAL AND ADMINISTRATIVE STUDIES (JPAS) UNIVERSITY OF PORT HARCOURT* no.4 (2023): 23-44.

Ramadhan, Riskiansyah, Syaiful Rohman, and Imam Khomaeni Hayatullah. "Devide Et Impera: The United Arab Emirates' Strategic Policy In Yemen." *Journal Middle East and Islamic Studies* 8, no.2 (2023):1-19.

Razali, Rodziana, Zulfaqar Mamat, Sarah Adibah Hamzah, Wan Abdul Fattah Wan Ismail, Tasneem Rahmatullah, and Asmaa Arinah Zulkifli. "Refugees In Malaysia: Protection Framework, Challenges And Implications." *Malaysian Journal of Syariah and Law* 9, no. 2 (2021): 157-172.

Saleh, M. A. K., and K. R. Manjunath. "Small and medium enterprises in Yemen: A financial aspect investigation." In *International EUROASIA Congress on Scientific Researches and Recent Trends-7*. Vol.1 (Azerbaijan: Baku Euroasian University, 2020): 408-416.

Sarhan, Mugahed S., Mohd Irwan Syazli Saidin, and Zarina Othman. "The Religious-Political Ideology of Houthis' Rebellion in Yemen: Theoretical Perspective of the Divine Right to Rule." *Islamiyyat: International Journal of Islamic Studies* 44, no. 1 (2022): 231-240.

Stenslie, Stig. "Decisive Storm": Saudi Arabia's attack on the Houthis in Yemen." *Norwegian Peacebuilding Resource Center* 1 (2015): 1-4.

Thiel, Tobias. "Yemen Imposed Federal Boundaries", *Middle East Research and Information Project (MERIP)*, diakses 19 Disember 2023, <https://merip.org/2015/07/yemens-imposed-federal-boundaries/>

Walsh, Tom. "Securitisation imperatives and the exaggeration of Iranian involvement with the Houthi movement by international actors." *Global Policy* 14, no.2 (2023): 385-395.

Yemen to become six-region federation,' laman sesawang *Al-Jazeera*, diakses 19 Disember 2023 <https://www.aljazeera.com/news/2014/2/10/yemen-to-become-six-region-federation>